

平家文集


十六三十八



漢書門	類	一〇二七七	七四函	一二架	六冊
-----	---	-------	-----	-----	----

庫	文	閣	内
平天	一〇二七七	六	漢
八	冊	架	

内閣文庫	番號	漢	10277
	冊數	12	(7)
	函號	3	1



国立公文書館
National Archives of Japan

糊などで貼り付けられている部分がめくれない個所があります。

原本の文字など不明瞭な個所があります。

綴じ部(喉部分)の文字など不鮮明な個所があります。

平齋文集卷第十六

平齋文集卷第十六

內制三

草文庫

光祿大夫右丞相兼樞密使鄭清之可
特授特進拜左丞相兼樞密使加食邑
食實封制

門下伊尹學而後臣商后所以懋格天之業周公
相而爲左成王所以綿卜世之休朕厲精百度之
新注意一賢之切望既孚於巖石位宜正於元台
咸輯群工渙揚大號具官某道包乎衆甫氣塞乎
兩間其無我則顏氏克己之仁其有爲則曾子守
之勇升暘谷之日而春萬象翊我初潛興太山

之雲而雨八瀛贊予更化即上天下澤以辨分本
內陽外陰而進賢導諫路之復開紛倖門之自塞
回狂瀾於既倒坐消貪濁之風泝大川而獨航期
濟艱難之運惟宿弊不容於驟革而駿功有待於
美成修攘之務孔嚴安危之寄逾重匪進久虛之
次曷旋丕應之機是用稽之端拱趙普之元勲參
以咸平李沆之舊德序陞左輔光踐前修總樞機
於本兵超品級於賜位仍陪多邑併衍真奮以尊
天官冢宰之權以應太微上相之象於戲一德咸
有莫大乎主善之爲師百志惟熙莫先乎任賢之
勿貳予欲天緯之穆予欲國棟之隆予

欲職業咸修汝明子欲聲俱和汝聽仰予皇帝
籲俊之意益究佐王治邦之功一人以寧萬世永
賴可

宣奉大夫知樞密院事兼參知政事喬
行簡特授金紫光祿大夫右丞相兼樞
密使加食邑食實封制

門下朕玩占泰象稽右乾文北斗璇璣之幹天樞
既運平於四序太微端門之列次相爰經緯於三
光肆嘉宥密之英夙稔弼諧之望誕揚制綽專告
廷紳具官某秉先覺之姿厲後凋之操學問貫穿
於千古器能苞括於三才退然不勝衣冠以至大

至剛之氣淵乎其似道形爲可觀可度之容徧儀
禁路之華趣踐政塗之峻力扶更化備罄陳謨卷
卷乎任賢而去邪懇懇乎理內而禦外尚猷詢茲
黃髮獨知籌慮之深咨岳有能奮庸咸謂延登之
晚睠予菲質紹我前修宴紫雲之樓念民生之未
裕開天章之閣虞國事之多艱楫舟必賴於丞弼
維厦匪資於一木參諸夢卜得爾耆明庸合守文
應變之長共致經體贊元之助仍摠提於樞筦兼
疊進於文階申錫多畬併陪真采於戲仲虺爲左
而伊尹爲右本一體以相須召奭在後而周公在
前必同心而叶濟惟於補衮則無彌縫之迹惟
妙於和羹則有調一之功惟精神強則國勢強惟
紀綱正則人心定俾予以治時乃之休可

金紫光祿大夫知樞密院事兼參知政
事曾從龍可除樞密使督視江淮軍馬
加食邑食實封制

門下朕祗承洪業遠慕駿功督江左之軍而國勢
張晉賴謝安之略視淮右之師而皇威暢唐資裴
度之籌顧采薇治外之孔嚴宜烝民任賢之尤急
妙簡元樞之望盡提諸將之權肆諏剛辰式渙孚
號具官某學醇而識邃德厚而器閎蚤擅兩都之
論魁蔚爲三代之王佐炳謀國之智先見洞平著

龜勵事君之忠精誠貫乎金石再踐政塗之峻獨
顯宥府之崇一念慮必圖又於邦家一計謨必思
安於社稷氣塞乾坤之大志期宇宙之清蠹棘藿
之黠戎乘女真之末緒并吞諸郡莽萬里之丘墟
蹂躪中原慘兆民之塗炭不顧夷夏大分之定不
思帝王正統之尊敢嘯餘兇自干顯討况太一之
神來格久占福曜之臨而甲子之曆有開適應初
陽之復趣迎善氣特命元戎皇天付予有家莫重
要衝之守寧王遺我大寶適資艱運之扶維文武
之全才蘊沉深之大略就陞使領仍衍并畚總表
撐裏拓而庭規摹合可後對而文節度風王草

木聲震山川聖策定有功可應兵之凡其儒
用而無敵何難賊虜之平注倚非輕延登有待於
戲義問之拒逆亮收萬全於拍顧之間張浚之卻
僞齊奏三捷於談笑之頃朕方恢於祖烈爾宜邁
於前修衆思集則精神彊列戍睦則首尾應亟舊
攘於外侮用勦相於中興可

左丞相鄭清之口宣

卿德尊朝廷勲在社稷欲重處中之寄宜膺虛左
之求宅揆奮庸揚庭孚號亟祗殊嫺力濟丕平

右丞相喬行簡口宣

卿斯文砥柱有國元龜久樞紐之密旋趣鈞衡

對秉綸言渙發輿望僉諧亟祗予休共圖乃又

左丞相鄭清之批荅口宣

延登上宰翊贊中興增九鼎之尊安永三階之澄
穆趣祗成渙母事勞謙

右丞相喬行簡批荅口宣

孚號大廷登庸碩輔允賴巨川之濟式隆巖石之
瞻亟効贊襄奚勤遜避

右丞相喬行簡批荅口宣

朕寤寐治功延登耆德既協從於龜筮宜交濟於
鹽梅其遏牢辭以圖丕乂

左丞相鄭之批荅口宣

天慈成功帝賚良弼首陟泰階之峻亟圖鼎鼐之
和勉爲堅留母煩牢避

知樞密院曾從龍同知鄭性之簽書陳
卓批荅口宣

外治有嚴中樞尤重必進爽邦之彥廼凝基金之
功勉効勝籌母勤遜櫛

樞密使曾從龍批荅口宣

十乘董戎亟宜引道五兵置使奚尚循牆體予憂
顧之深寢爾撝謙之過

節度使謝奕昌批荅口宣

卿世業韋平家法陰馬寵陟齋壇之峻榮施先

之崇渙綽已孚異函可遏

節度使謝奕禮批荅口宣

卿椒掖流暉芝庭峙秀襲冠貂之積慶膺綬鵠之殊恩朕授非私爾辭母屢

賜龍圖閣學士京西湖北路安撫制置大使兼知襄陽府趙范兵部侍郎淮東安撫制置使兼知揚州趙葵銀合夏藥勅書

卿望聳禁塗籌高邊閫屬履炎蒸之序備殫牧御之勞宜錫上奩用旌內劑禦茲烈日揚我仁風

賜工部侍郎公江制置使知建康府陳

韓銀合夏藥勅書

卿法從名流陪京重寄

餘同上

賜權兵部侍郎四川安撫制置使趙彥呐銀合夏藥勅書

卿天派名流坤維重寄

餘同上

賜司農卿知慶元府兼公海制置使游九功銀合夏藥勅書

炎令司衡赫威鑠石廼睠輔藩之彥具宣制閫之勞爰錫珍良式資寶衛

賜右文殿修撰四川安撫制置副使兼知成都府丁黼銀合夏藥勅書

延睠漢廷之彥具宣蜀閩之勞

餘同游九功詞

賜兵部郎官兼淮西安撫制置副使兼知黃州楊恢銀合夏藥勅書

廼睠漢廷之彥具宣淮閩之勞

餘同游九功詞

賜直寶章閣權發遣鄂州兼權沿江制置副使張元簡銀合夏藥勅書

炎令司衡赫威鑠石廼睠上流之寄具宣外禦之勞爰錫珍良式資寶衛

賜鎮江府都統制王虎池州都統制趙邦永鄂州江陵府副都統制樊文彬江州左軍統制權管幹光州武定都統制司職事主忠銀合夏藥勅書

三庚御序萬甲分屯總戎律以良勞犯炎威而不憚宜攷珍劑用示眷懷

賜平江府許浦水軍都統制董琳銀合夏藥勅書

三庚御序萬甲分屯護海道以良勞犯暑威而不憚宜攷珍劑用示眷懷

賜帶御器械兼權主管馬軍行司公事兼知光州孟珙建康府都統制兼知泗州李虎鄂州江陵府都統制兼權發遣德安府王旻興元府都統制李顯忠鎮

江府副都統制劉虎襄陽府忠衛軍副都統制江海權沔州都統制司職事陳昱權利州都統制司職事曹友聞權廬州強勇軍都統制司職事王福利州後軍統制權行管幹金州都統制司職事吳桂銀合夏藥勅書

三庚御序萬甲乘邊揔戎律以良勞犯炎威而不憚宜放珍劑用示眷懷

賜龍圖閣學士京西湖北路安撫制置大使兼知襄陽府趙范銀合臘藥勅書卿任隆外閫威聲上游犯霜露以靡寧護風寒而良苦爰錫衛生之寶用旌敵愾之懷爾精神寬予憂顧

賜權刑部尚書沿江制置大使兼江東安撫使知建康府陳韓銀合臘藥勅書卿佩囊法禁典鑰陪都凜水澤之中堅嚴風寒之外護爰錫攝調之劑用昭眷倚之懷壯爾精神寬予憂顧

賜寶章閣待制沿江制置副使兼知鄂州黃伯固銀合臘藥勅書

卿承恩中宸建閫上游犯霜露以夙征護風寒而良苦爰錫衛生之寶用旌敵愾之勞壯爾精神寬

予憂顧

賜兵部侍郎淮東制置使兼知揚州淮
東安撫使趙葵將作監淮西制置副使
兼知廬州尤煊銀合臘藥勅書

朔雪方霏淮風更凜言念制垣之重備殫王事之
勞爰錫珍良用資葆畹增壯魚麗之氣茂揚鶴唳
之威

賜權兵部侍郎四川安撫制置使趙彥
呐右文殿修撰四川安撫制置副使兼
知成都府丁黼銀合臘藥勅書

卿分憂北顧制勝西垂犯霜露以靡寧護風寒而
良苦爰錫攝調之劑用昭眷倚之懷大振戎容亟
蘇民瘼

賜太府卿四川總領兼撫諭使安癸仲
銀合臘藥勅書

卿分憂北顧宣指西垂

餘同上

賜司農卿知慶元府兼沿海制置使游
九功銀合臘藥勅書

卿坐綏海服密拱京畿凜水澤之中堅嚴風寒之
外護爰錫攝調之劑用昭眷倚之懷民瘼旣蘇戎
容益振

賜帶御器械兼權主管侍衛司公

事兼建康都統制王鑑帶御器械兼樞
主管侍衛馬軍行司公事兼知黃州孟
珙帶御器械鎮江都統制李虎池州都
統制趙邦永鄂州江陵都統制兼權發
遣德安府王旻興元都統制李顯忠平
江府許浦水軍都統制劉虎權光州武
定都統制司職事于俊權利州都統制
司職事曹友聞利州後軍統制權行管
幹金州都統制司職事吳桂權江州副
都統制楊福興襄陽府忠衛副都統制
江海鄂州江陵副都統制兼知襄陽軍
樊文彬平江府許浦水軍副都統制兼
知海州趙東淮西路鈐兼權廬州強勇
諸軍副都統制司職事王福權管汴州
都統制司職事和彥威銀合臘藥勅書
卿等系出山西威行塞北慨朔風之未靜忘霏雪
之爲勞資以寶奩實之珍劑用壯前茅之氣進圖
破竹之功

賜端明殿學士同簽書樞密院事督視
江淮京湖軍馬魏了翁銀合臘藥勅書
卿推誠體國決計視師犯霜露以靡寧護風寒而
以苦爰賜上池之劑用紓先乘之勞壯爾精神

子憂顧

賜直徽猷閣公海制置副使兼知慶元

府王定銀合臘藥勅書

卿顯膺闡寄坐鎮瀛壖

餘同游九功詞

文舉殿試策

朕猥承至尊休德于今一紀夙寤晨興懼不克負荷以羞列聖廼者收攬大柄躬親萬務嘉與海內共濟丕乂拔人材於久鬱疏言路於積壅亦既踰年而更化善治猶未云獲豈弊端膠轄汙俗沉浸未易遽更與抑崇名忘實齊末遺本所更者政而不及化與訂責治愈切而愈邈也黃帝堯舜通其

變使民不港非聽其窮而莫之及垂衣裳而天下治必有妙於化裁推行之表者三代忠質文之尚其敝未始不可救而禮有損益隨時施宜亦非區區於制度文爲之間也孔子變魯至道孟軻以齊王猶反手綏來動和過化存神固不容以淺智窺而四代禮樂經世之大法三王四事治國之要道知之者衆而行之者寡何與夫天命不難於延續而難於疑人心不難於轉移而難於固朕歷觀治忽消長之運念此至孰而行有弗逮國體嘗少振矣而苟且相仍未保其不弛國論嘗少定矣而是非交至未保其不搖國勢不可不彊而爲厲兵

屯田積穀未能兩全攻守之宜國計不可不裕而約已厚下開源節流未能一出取予之正伊欲整紀綱於姑息之餘飭法度於因循之後洒濯衆志新美大化以凝固天命人心於無窮其要安在子大夫彊學待問久矣其據經證古科別以對朕將親覽焉靡有所隱

武舉殿試策

蓋聞有天下者審其御御有得失則狙詐有作使作敵之殊自昔英君猶難之朕厲精更始以來無日不討諸軍國以興起治功而轡策一世銜檠四夷每有慕於漢高祖經營帝嘗在壇而拜以龍椅

信踞洗而召以挫黥布御將帥之法然也周廬內衛列屯外戍使功使過俾皆踴躍奔走於作興之下而無跣弛之累兒戲之習其道何先光武再造炎圖璽書明見以服竇融憤坐迎笑以折馬援御豪傑之法然也中原遺材慕義來附效智效勇俾皆歡呼鼓舞於大受之中而無養鷹之患放虎之虞其術何要孝宣號稱中興先零負固則留屯浩亶以平之呼韓稱藩則置酒甘泉以饗之御夷狄之法然也故讎雖殄新隣方張或和或戰情僞叵測在我必有以待之進可爲車攻之復古退不失采薇之守衛其策何上夫能御將帥而後能御豪

傑能御豪傑而後能御夷狄審本末之序權緩急之勢以制動靜之機操縱闔關顧不在我乎至若軍律之當嚴戎旃之當睦邊民之當卹新氓之當撫無一不關宵旰之慮子大夫有志事功其悉意茂明之朕將親覽

召試館職策

天下大勢首蜀尾淮而腰脊荆襄自昔所甚重也諸葛亮之用蜀祖逖謝元之用淮羊祜陸遜之用荆襄規摹具在得其人善用之則撫機酬變進退闔關豈不在我而猶患備守之匪易蜀方告警襄戎嚴且蔓延于淮賊虜爲三市以觀所應故我之應敵不容出於一術諸閫之私爲援如常山之蛇力非不合也或慮趨前不能無後顧畫境人自爲守可無連雞之患然同舟遇風又慮一處不牢則俱受其害分建三數大鎮聚甲兵糗糧以重其權似可熊卧虎視而並塞列城護風寒之地恐難於歛戍使寸寸而守之則備多力分抑兵家之所忌挾初郡以爲外扞庶增藩籬之固而鞭長或不及於馬腹委難助而棄之又幾前功之俱廢沿江諸大屯招兵增戍而練舟師門戶之急務也或謂守淮襄自能蔽江原堡綿亘於鳳沔所以保蜀也移三關之戍而扼三泉得無已迫乎督府駐荆

鄂上流壯矣金房聯蜀海道接淮延袤數千里或
虞運掉之難隨地分立莫府則大費又未易支也
以至南北軍何以相制官民兵何以相使屯田於
新疆何以能不資敵調夫於邊郡何以能不重擾
子大夫熟於觀時切於憂國其舉三邊備守之要
悉意陳之將復于上

萬壽觀純福殿開啓甲子本命道場青

詞

玉曆紹休猥次周星之歲金行紀閏適臨元命之
辰祗被瑤壇具宣瓊錄伏願真游潜格景况旁流
六扈有秋陶人心於和樂三皇無警鞏國於尊

安

朱表

孟秋月閏先甲命元肅延真馭之臨仰控忱衷之
禱上銷咎證下鎮危情格不义於萬方儲鴻休於
百世

太一宮祈晴醮青詞

西成應允南畝占豐熏心淫雨之憂拜手叢霄之
禱伏願飈旂潜格曦馭昭升凡陶玉燭之和均燕
金穰之慶

永祐陵下宮

顯恭皇后殿神帳後壁

山墻坍損修整畢告遷神御還殿表文

奠幄栢宮靈旂夙御繕垣椒寢僊伏嘗移屹鳩儔
之告功儼燕寧之復次

孟冬朝獻祝香文

伏願乾文循軌泰道迂衡愛日薰和民遂恬熙之
樂朔風絕警軍無暴露之憂

昭德崇勲閣安奉太師趙汝愚貌像祝

文

維姬有旦維宋有公斷鰲莫極賓日升穹歲閱周
星祀登功宗諏禮曲臺妥靈肖容肩摩前詰凌煙
姬隆

祭告功臣二十三人祝文

容臺丹青森拱星弁有虛其席惟人是踐植我前
寧盤宗碩彥訊良告虔俎豆群獻

甲子本命青詞

氣轉一陽甫應初躔之紀辰開六甲首逢端命之
元祗演雲籤仰延飈駕伏願天光下濟帝况博臨
壽域四方永底凝民之治金城萬里亟收卻敵之
功

滿散朱表

序屆初陽辰臨元命宣演冲科之祕導迎善氣之
新鶴唳風聲奉天威而制勝星暉日暈受帝祉以
繇休

立春祭太一祝文

天尊神兮挾東皇龍駕翔兮周八荒五福舍兮迪
時康祠壇紫兮歌青陽神宴娛兮夜未央星留俞
兮集祥光四氣和兮萬有昌三垂晏兮九農穰多
受祉兮命溥將

太一宮交年醮青詞

化功密轉序首正於孟陬歲事更新灋肇頒於象
魏輒輸悃素仰扣旻蒼靖念眇躬適逢多故狂胡
反道方孔熾以逞兇降虜背恩又相挺而濟惡狼
烽交於梁汙騎盭徧於荆襄由秉德之不康寧致
御事之曰艱大敗叢霄而引外迎端朔以祈休伏
願上帝昇矜尊神篤佑以全正勝亟清玉塞之塵
轉危爲安增壯金城之勢九遂耕桑之樂悉歸覆
育之仁

天基聖節青詞

保右自天運應一元之泰誕彌厥月氣陶萬彙之
春展案瑤壇投忱璇極伏願兩儀申祐列曜延光
時和歲豐妙協玉衡之正兵寢刑措屹隆磐石之
安

朱表

星回黃歷茂迎震夙之期雲護芝函備展泰元之
薦仰祈昭鑒申錫鴻釐東作西成躋民生於仁壽

南暢北洽措國勢於安彊

孟春朝獻祝香文

伏願緝熙純嘏保合大和雨霽秧疇咸樂東郊之業風恬柳塞盡清南牧之塵

攢宮補種祝文

路寢孔碩每切慕思春露既濡宜加結植先事以告維靈之安

孟夏朝獻祝香文

伏願本支蕃衍置場牧寧物被生成穆若薰風之阜民陶耕鑿熙然化日之舒

雨師雷師風師祝文

天步之艱以稔爲命龍見而雩雨不時若高原下隰燠其乾矣熬熬然卷簑笠倚耒耜以告瘡神所閔也雷霆以鼓之風雨以潤之坎震巽三者之氣合而陰陽和甘沛應既霑既足迄用康年維爾神之功

昭慈聖憲皇后永思陵憲節皇后憲聖慈烈皇后下宮修葺奏遷神御表文

蕤茲歲時蟠佳氣於兩儀實寶枚枚輦闕宮於千古飭御史以省視戒工師而繕修遷御有嚴前期敢告

孟秋朝獻祝香文

伏願氣調玉燭序秩金行兩足周原年屢登於六
有風清漢塞運丕濟於中興

天基聖節錫宴致語

帝出乎震祥開華渚之光雲上於天恩錫鎬京之
燕恭惟 皇帝陛下聰明時乂剛健日新與物爲
春播大和於有截自天申命綿景祚於無疆臣等
幸備伶官願陳口號

寶鳳啣春度玉墀開基節後即天基日行黃道三
辰秩斗轉蒼龍萬象熙扶起車攻常武運做成既
醉太平時千官拜舞東風裏歡上延英萬歲卮

勾合曲

高岳三呼山輦聖人之壽鈞天九奏泰融治世之
音上奉天顏教坊合曲

端平二年端午貼子詞

皇帝閣五言三首

更化開皇極中興兆赤符節標千歲曆氣協五時
圖

又

雨足秧分畦風清麥弄岐聖心涵水鏡即是太平
基

又

明進離方午柔生遇己陰妙參三聖易細測兩儀

七言三首

緝熙虛敞薰颺細清燕深明晝晏長大學中庸繙
詠久金猊幾度手添香

又

登進英才追慶曆開延正論踵咸平朝廷有道長
如此拜賜宮衣信是榮

又

王師一舉下河東好定規摹繼伐功入眼宮槐宜
夏日轉頭關柳易秋風

貴妃閣五言二首

風
佩襲芳蘭碧釵明寶篆深宮三十六同被二
風

又

萱長宜男草榴開結子花歡聲喧令節慶事屬天
家

七言三首

綺疏浸影槐龍轉繡戶浮香艾虎垂硯冷玉蜍金
井水手抄警戒愛君詩

又

裁成寶月翻宮扇織就祥雲製御衣朝賀歸來無
點暑坐看燕子引雛飛

又
穿蓮漏永金鋪邃雪藕衣輕玉殿涼好把無邪毋
不敬細挑綵字壽君王

端平三年春帖子詞

皇帝閣五言三首

開
飲鳳東風轉攜龍北斗回人間道鐸振天上獸樽

又

春
冰天寒色錢暘谷霽華賓生意乾坤蒲宸襟一點

又

覽大朝廷詔中和郡

可欲求躋慶厯先使具清

熙

七言三首

喚仗紫宸披曉靄退朝清燕坐晴霏簡編有味爐
熏永鈴索無聲漏箭稀

又

東風送喜上天顏吉語飛來井軫間榆塞雪消鳴
鏞靜柳營春暖擊刁閑

又

麥苗培秀臘前雪稻種浸芽春後晴野老田夫觀
治象便從新歲賀升平

皇后閣五言二首

太液輕澌泮溫明霽日融
萊流芳卉碧花頌瑞椒紅

又

甲觀韶光集謀壇好語傳
思齊男慶百假樂子宜千

七言三首

塗山陰贊夏王化嫺汭密禪虞帝仁
保合大和無間斷際天蟠地一般春

又

閭雉風化冠周南

天及葛覃

女紅方起又親

又

殷雷金鑰千門邃斜月璇題六寢深
禁柳護寒鴉未起來衣已獻晚朝箴

貴妃閣五言二首

梅試催粧粉蘭披入夢香迎春占北斗
受福拜東皇

又

象應軒龍次恩承帝座光燕壇風澹蕩
蠶館日舒長

七言三首

春透蓬萊碧玉壺晴窗恭侍寶奎敷從容玩畫家人卦取次題箴列女圖

又

鵲雪殘籠霽景鵲鵲波暖颺紋漪宮中不用催行樂草木群生各自熙

又

萬年枝上綵裁綠千葉花頭酥點紅鏡綬囊絲相映燭探先半月慶流虹

平齋文集卷第十六

齋文集卷第十七

外制一

國子司業張處除祭酒仍兼侍講制

勅具官某賢必希乎聖士必希乎賢朕欲新美天下之士親擇老成有賢望者爲國子師士非幸歟爾淵乎海濱之老也見幾而蚤遜覽德而肯來俾參師氏詔燉于虎門望其容則易直子諒之心生聽其辭則淵泉溥博之義見而况樞衣問業於函丈之間者茲用進之大司成以專六德之教師道立而善人多豐芑所以爲數世之仁朕其庶幾乎可

樞密檢詳表肅除右司郎中兼權樞密

副都承旨制

勅具官某朕更張萬化首命一相筦文武之柄宰
掾以贊政理樞掾以參訏謨非深識厲精求治之
意不在此選爾學得其傳而遽於知氣集以義而
勇於行端笏立朝論議閎偉朕知其可大受也挈
宏綱於省闈導密旨於殿陛肆兼命爾維時股肱
大臣內欲爲朕修天保以上之治爾彌縫之外欲
爲朕舉采薇以下之治爾佐佑之往欽哉可

右司郎中袁肅除太府少卿兼知臨安府制

官某維前聖人得名法從濬正太之源以養
君德折茲邪之氣以興人心學無不該用有未盡
求諸一庭詩禮之彥爲我四方岳牧之師爾講貫
有源業履甚度盤根利器奏民庸而獨高熟路輕
車聳朝望以更偉肆簡都曹之最進參列寺之華
典吾神臯資乃儒術俗久壞而周南之化未浹政
積弛而商邑之治未張澄精神於百爲妙機括於
一轉迪若考詩書之訓宣朕躬道德之行民情咸
熙國勢自重此非趙張三王所能知也往遠乃猷
用對予渥可

大理少卿李鳴復除大理卿制

勅具官某朕近觀勅令所編類舊典我 孝祖宸
筆逐事點勘增修刪改曲當情法於恤刑之條尤
加詳焉企慕不已因親扎以示輕用徒刑之戒廷
尉天下平可不遴擇爾表于西州儀于玉朝心夷
氣蘇藹然君子長者之風廼者俘累之獄咨爾聽
之簡稽得情弊成以宥而朕好生之德被于貉隸
達于窮髮之北良用嘉歎晉躋九列帥屬棘廷使
四方司政典獄咸知朕欽恤之意念之哉刑期無
刑以長我王國可

吏部郎中趙彥恢除大理少卿制

勅具官某朕近觀勅令所編類舊典我 孝祖宸
筆逐事點勘增修刪改曲當情法於恤刑之條尤
加詳焉孰復企慕因親扎以示輕用徒刑之戒廷
尉天下平可不遴擇爾講學之粹操履之茂標的
于公族而吏治更高司臬江左讞奏平允一道無
冤民入爲望郎進參列棘四方司政典獄於爾乎
則焉欽哉刑期無刑以長我王國可

國子博士李大同除祕書丞仍兼崇政

殿說書制

勅具官某斯文在天地間前乎管百世之既往後
乎鑰百世之方來非諸儒誰屬爾以經明行修都
倫魁之望詩所謂如金如錫如圭如璧者也列在

書帷据經訂古以沃朕心具有師法朕甚嘉之繇
博士進丞中祕仍懋金華之業蓋將閱其中而肆
其外用昌斯文豈特以鎮吾群玉之府可

著作佐郎蔣重珍除著作郎仍兼崇政
殿說書制

朕甚嘉之繇佐謨進領著廷

繇同前

校書郎黃朴除著作佐郎仍兼崇政殿
說書制

朕甚嘉之進繇典校佐謨廷

繇同前

太常博士徐清叟太學博士葉味道
除祕書郎仍兼崇政殿說書制

爾以經明行修茂名家之傳

繇

爾以經明行修都儒林之望

葉

朕甚嘉之繇博士進典中祕

繇並同前

祕書丞彭方除著作佐郎兼權侍左郎
官制

勅具官某斯文在天地間前乎管百世之既往後
乎鑰百世之方來非諸儒誰屬爾以經明行修都
儒林之望詩所謂如金如錫如圭如璧者也承于
祕丘攝組畫省銓綜餘隙盡讀未見之書韜涵日
富進之佐著蓋將閱其中而肆其外用昌斯文豈
特為時佳吏部哉可

秘書郎張洽除著作佐郎制

入典中祕盡讀未見之書

餘同彭方制

敷文閣學士通奉大夫程秘該 慶典

轉正議大夫制

勅奉壽卮於長樂方深追慕之悲通禁籍於甘泉
尚共榮懷之慶有嘉宿德何愛崇階具官某學邃
而識融履純而養厚濟時欲議五英六莖之龢華
國高文四璉八簋之古自玉堂之引去每宣室之
興思胡扼虎關尚閑駒谷復非遽復已萌於碩果
之餘朕不終朕必合於遇雨之後首進班於宮閣
仍賦藻於珍臺在爾初無慕爵之心惟朕蓋有懋
官之典肆加蕃錫庸侈殊私旆戟方新寧鬱起家
之望佩囊惟舊毋忘存闕之忠可

著作郎權司封郎官吳泳除軍器少監

兼直舍人院制

勅具官某朕親攬萬機總飭百度與士大夫洒濯
激昂以追元祐思得軾轍掌我書命興起人心於
播告之下爾操行純茂文思汗瀾本之詩書暢之
莊騷太史體宜演誥朕有戎監職優務省往服少
事雍容討論推厲精更始之意著之訓辭渾厚森
嚴與越棘大弓同其古斯無媿江漢之靈矣論駁
以扶國是朕又於此觀爾之風力可

禮部郎官兼學士院權直趙汝談除祕書少監兼權直學士院制

勅具官某中興百餘年公族之直禁林惟淳熙間彥中一人爾識度純明風槩凝遠杜門著書尚友千古皎皎白駒之在空谷也泰道宏開勉爲朕起南宮北扉文簡而有法進參木天之峻仍直丹地之嚴選妙擢殊前後間見爾其推朕厲精更始之意著之訓辭使四方萬里咸曰大哉王言一哉王心是爲稱職可

太府少卿何炳除司農卿制

勅具官某文帝一形錢穀出入之計貫朽粟腐其効立見朕於國計登耗念之熟矣而大農經費常患於不澹何耶爾性行純固材諳通明蚤游刃而有餘晚韜光而更密入參治藏之府曾幾何日能聲著聞進長九扈將以裕吾國也孰漏當室孰蠹當除孰冗當節公爾忘私毋憚叢劇庸稱予厲精政事之意可

金淵李桀並除太學博士制

勅具官某等科舉之學非所以淑士心也必義理性命之學明則多善士化更而新師選可不重乎爾抱負閎講貫熟製錦劇邑弦歌藹聞可以爲成師矣敷暢奧義薰陶善性使諸生人人有舞雩

言歸之樂則吾與點可

太學博士葉應輔除國子博士仍兼景
獻太子府教授制

勅具官某科舉之學非所以淑士心也必義理性
命之學明則多善士化更而新師選可不重乎爾
抱負閎講貫熟模範賢關惠訓宗師能茂明所學
可以爲胄子師矣敷暢奧義薰陶善性使人人有
舞雩詠歸之樂則吾與點可

奉議郎袁立儒錕賞轉一官制

勅具官某間者均光襄房之役靡勞不酬爾材良
氣雋優於邊畫督錕以濟軍事不憚軼掌禦侮制
有勞焉朕方信賞以勸事功汝官一列其懋
承之保障最聞嗣有褒擢可

全子材除淮西安撫副使兼知廬州兼
計度轉運副使制

勅具官某朕夢想東都廼瞻西顧若昔濡須之築
芍陂之屯郾城之士飽馬騰淝水之風聲鶴唳欲
追往躅宅牧良難爾彊乂而忠果達且武荆襄淮
海備著賢勞入奉朝列之華出鎮邊維之重四履
綏靜三軍激昂令行陳潁之間氣薄潼潼監之表朕
嘉爾勇於徇國就畀帥旄仍摠飛輓用究多多益
辨之韞維和戰之議論不齊守禦之規模一定

重敵而遠慮勝而會必臨事而懼好謀而成能圖萬全何往不濟爾尚勉之哉可

贈寶文閣直學士楊邁特贈龍圖閣學

士制

勅朕慨念漢宣入承天統博陽侯之定策方共致於中興馭中翁之受詩胡獨成於長往密勿麟儀之舊淒涼馬鬣之新瞻懷若存褒贈宜厚具官某抱古粹學事予初潛反覆發明盡詩書禮樂之奧從容規切必仁義道德之言每尊所聞務藏諸用既授五龍而夾日忽比列星而騎箕雜佩贈之莫克仔肩之益一鑑亡矣可勝殄瘁之心維郇典之有加尚徽章之未稱峻陟淵圖之序增泉壤之光易文子之名死宜不朽錄叔敖之後生與俱榮尚其營魂服我休寵可

黃壯猷何處信課最各轉一官制

勅具官某總核名實而信必其賞罰親政之急務也爾守信何處貳輔藩有美政且能濬導利源坏窳蠹穴版部課賦入以最聞增秩賞能庸示予信其益厲精白以承可

右正言王遂除殿中侍御史制

勅具官某朕始親萬幾首得一士置在明目張膽之地蔚有正色敢言之風神鼎鑄而魑魅莫逢干

將淬而犀兕亦斷善類吐氣貪夫革心察之既稔
所安用之不厭其速甫躋諫列丞副臺端純仁之
內出姓名蓋非輕授趙抃之不避權倖抑所優爲
朕方虛已以受人爾亦得時而行道難逢者風雲
之胥會易失者日月之如流萬古在前億世在後
毋替精白承休之節用爲汗青傳遠之圖可

吏部郎中兼右司李宗勉除監察御史

制

勅具官某蓋聞淫朋去然後可以穀正人側媚屏
然後可以用吉士天運之往來消長此其機歟爾
和而趨於中大而進於正日用力於明善之學如
恐不及游奉郡最入儀郎省素絲一節未嘗以爵
祿入於心諸大夫國人皆信其爲賢也朕方謹愼
人充耳目之戒儀圖可御史者莫如汝宜在易一
陰不能勝五陽則決之於坎五陽不可忽一陰則
杞之於遇潛觀機括而制其微天下可常泰也爾
亦有辭于永世可

大理卿李鳴復除侍御史制

勅具官某朕稽家法之相傳睠臺綱之特重仁
廟思得忠厚淳直之士裕陵務革澆浮薄惡之
風蓋心術正則無詭隨議論平則不沽激欲維吾
國且表告人爾秉心澹夷蘊識精粹良吏之譽溢

於外服吉士之稱著於中朝甫陞卿月之華趣應
法星之象維昔田錫暨于何郊莫非西土之英列
在南床之選幾年無此一旦得之春秋之盡而不
汙大關榮辱洪範之會其有極一洗黨偏百辟咸
慕乎君子之中四方聳聞乎仁者之勇繫予所屬
惟爾其承可

祕書丞兼崇政殿說書李大同除右正

言兼侍講制

勅具官某師氏詔燉保氏諫惡皆有道之士爲之
朕厲精求治之初增置經筵官相與講明五三六
經之道以養其源諸儒序進檐如翼以爾於其間
瀟眉皓白氣肅而辭莊淵乎其似道也朕退而
喜曰得一佳諫官矣擢真騎省仍侍輶廈逆耳沃
心朕於爾乎嘉賴官守一時之臧否言責萬世之
榮辱毋憚嬰鱗有懷不盡然軺輪折檻特救過於
已著望儀刑而意消不聞亦式不諫亦入庶其置
朕於無過之地乎可

呂殊除太學錄制

勅具官某科舉之學非所以淑士心也必義理性
命之學明則多善士化更而新師選可不重乎爾
抱負閎講貫熟金玉其度而不苟售可以爲成均
師矣規矩脩明之餘數暢奧旨薰陶善性使人人

有舞雩詠歸之樂則吾與點可

太宗正丞蔡範除戶部郎中淮西總領

制

勅具官某三表五餌不如是錯實塞之策破羗強弩不如充國留田之奏綏御皆不可廢夫守也爾名儒之曹良吏之表廉靜有立不爲苟同宜出入省闥以緝庶務中原事機方集必事力之裕乃克濟庸輟爾以尚書郎給餉道往哉守淮所以蔽江而控河士飽而歌馬騰于槽淮西之成雋功以此出納有經而無壅利取予有權而無近名足食足兵爾蓋優爲之寓攻於守而不殊其守蓋以古

王可

歸順人李義承節郎張瑀李德魏瑀保

義郎制

勅具官某討叛以誼懷服以仁殲渠貨脅歸斯受之爾能革心奚愛勇爵祇戴寬恩勉圖報効可

歸順人同鼎武翼郎王聞顯武翼大夫

呼延實來伯友修武郎制

勅具官某國家推天覆之仁舍逆取順豈以南北爲間爾等執羈縻以從亡虜途窮力屈束身歸命朕不汝棄也易畀武級之勞毋忘忠力之報可

廣州觀察准官魏國梁歿于王事贈通

直郎制

勅具官某嶺南不靖爾挺身往諭恩信亦既勤止得疾于行齋志以沒錄勞進秩尚慰九泉可

淮西路鈐范用吉授高州刺史節制京西北路軍馬制

勅具官某殘虜就燼中原為墟關河方俟於來蘇陳頴首歸於疆理上功莫府謂爾有勞亟陞遙刺之華仍揔進屯之重祗承休渥益勵忠勤可

江陵府副都統孟珙特轉武經郎制

勅具官某方城為城漢水為池天險也制闢設險加嚴峙芻榦具畜重濬深堦高屹然金湯之固勞來上爾實程督進秩二等用彰事功可

西和州守陳寅妻安人杜氏男基堅壘死節贈官制

勅具官某妻某氏

男某

西和嬰孤城抗賊力窮援

絕臣為國死忠子為父死孝妻為夫死義三綱立焉捐身犯難人所甚難闔門徇節古亦罕見朕悲歎不忘優贈以貴營魂往從爾夫于廟食可

三子改夫

父為

西和州守陳寅族人立照重館客李良臣死節贈官制

勅具官某族人某人等

館客

西和嬰孤城抗賊力

窮授絕臣爲國死忠子爲父死孝妻爲夫死義三
綱立焉爾以族黨良臣爾館于守義不苟免亦相從于死
良用嘉歎贈秩以資營魂往從寅于廟食可

權兵部侍郎陳公益磨勘轉中大夫制
勅朕一日萬幾厲精方切三歲群吏考績尤嚴肆
疇法從之勞庸渙明綰之寵具官某操修無玷問
學有源簪筆雍容每罄論思之益敷經密勿屢殫
啓沃之忠繇積日以效功爰歷年而會課瞻賢雖
舊詔爵惟新漢中大夫之負寢高秩序周小司馬
之職勿替謀猷可

秘書少監徐僑除太常少卿制

勅具官某禮者天地之序樂者天地之和兼
兼命也而簞瓢陋巷之士夫子遽以四代禮樂付
之何哉爾好古學行古道瞻彼淇奧其容比於禮
考槃在澗其節比於樂朕方網羅衆俊聚之本朝
老成典刑思見如渴擢貳蓬省翔而未集又舉奉
常亞卿以進之時行則行幡然一來講明王道於
玉帛鍾鼓之外以善人心視獨善有間矣母使朕
有齊魯二生之歎可

楊一夔父秉遷 明堂恩封承務郎制

勅具官某父某人宗祀慶成均福寰宇高年尤吾
所重爾稟厚養深年過九袞有子登名于奉常

代之佐孰復於安危之勢雍容乎進退之機始終
幾年夷險一節東山之卧安石常存憂世之心江
左之見夷吾盡究濟時之略登崇有待注想惟深
頃展采於合宮躬受釐於宣室肆盼祭澤增錫圭
畚以昭體貌之隆以侈榮懷之盛噫靖四方於我
將之頌朕正切於儀刑上萬壽於天保之詩爾毋
忘於歸美趣承丕渥入告嘉謀可

資政殿學士葛洪 明堂加恩制

勅朕稽周典九筵之規酌義經二簋之義禮從簡
約誠罄精純玉璫黃流哀時之對青元神策何八
之休屬侵容之宜惠術之具奉書可

播顯綸具官某簡而廉剛大
一日用力於仁特立獨行雖三公不易其介甫罄
弼諧之益遽興恬養之思心廣而體自胖年高而
德彌邵方詳延於俊乂每渴想於老成翊翊而神
嘉虞雖阻受釐之間皇皇而帝宴饗盍均賜胙之
恩申衍祖畬光昭簡注噫列文辟公之錫祉福聿
圖繼序之功黃耆台背之介壽祺尚篤乞言之意
體予寅畏告爾辰猶可

左諫議大夫鄭性之 明堂加恩制

勅朕蒐儀先甲展采上辛賦思齊之詩制雖嚴於
孝恭稽我將之頌禮不廢於宗祈恍三靈之宴

道百祿之來下有嘉首謨宜錫閑休具官某抱陸
贄之忠勵汲黯之直深見遠識平國論於玉衡忠
言嘉謨開君心於金鑑其博大則廊廟之器其浚
明則邦家之光啓沃方深鄉用良切授策而拜泰
一莫侍奉高之祠受釐而問鬼神尚前宣室之席
肆增華於騎省庸申衍於爰田雖舉邦彝實均帝
祉春秋承祀欲大祖功宗德之傳夙夜畏威
勿替天命人心之戒可

吏部尚書崔與之

明堂進封南海郡

開國公加恩制

勅送舊儀先甲應奉上年式

孝慕稽我將之不廢方宗
道百祿之來下聿懷耆俊宜錫閑休具官某行峻
而約之中氣剛而養以直風暨高古秋霜烈日之
嚴典刑鎮浮泰山喬嶽之重海十行之趣召儼三
命之滋恭展也達尊爛然全節延英論事莫遑汗
盛夏之衣宣室受釐猶思前半夜之席肆肇開於
公社仍申衍於爰田繫舉邦彝實均帝祉積德而
後興禮安得魯生之來爲治不至多言勿替申公
之告可

敷文閣直學士知潭州余巖除華文閣

學士公海制置使知慶元府制

勅朕總治中朝分任外閫或統江淮表裏之勢或當襄蜀風寒之衝廼瞻鄴江近扼海道欲壯股肱之郡必求方面之材具官某學明而履方氣充而用博操縱闔闢莫窮應變之長卷舒屈伸不改有常之度擁甘泉之宿望鎮長沙之价藩謂弄兵多出於無聊而患盜每生於有欲風采一振號令具孚驩綠林之革心渺青草之息警轉聞良偉簡在逾深寇恂之定潁川久徇借留之請蕭生之守馮翊更圖詳試之功陟奎閣之穹班總制垣之重寄宏開四履遠控三韓惟威望聲人飄浪舶之無虞惟恩信著則唯人卉衣之人

日里福併及於京官緊我與

直秘閣新成都府路提司趙彥覃除都大坑冶制

勅具官某國計莫重乎銅楮之相權朕出寶帑之儲歛宿楮而易之物價寢平又必鐘官能振厥職爾天支之秀周行之雋甫起家于蜀部舉圜府之權盡畀之進用亟矣唐諸道置爐九十有九人南為多地產今猶昔也爾能公以程浮冗明以剔姦蠹敏以幹壅滯少府水衡之積何患不承平若哉可

太后山陵衛工錢忠表趙若浚轉一官

制

勅具官某等六駟復土五使置官凡備驅馳悉霑
賞賚爾祗吏役例進一階茂對恩榮勉思策厲可

李安國特轉武節郎制

勅具官某比歲蜀閬失馭潰旅迸逸爲民害甚於
寇爾薰染忠義奮揚驍雄扼險要待其來民恃以
無恐果山至今德之增秩旌勞嗣有褒擢可

直祕閣知温州游九功除司農少卿制

勅具官某良二千石入爲九卿漢法也北海先生
以治行第一掌周稷之業蓋此上上爾庸敏而靜

易而立京蜀制一屢更名一至一

坏民安其政而有一思可謂良一

之弊循名責實思用其良不俟一茹上計以漢法
選貳司均夫長於治民者必優於裕國信能爲朕
養其和節其流而時斟酌焉錢穀之間其紓乎可

林禧子封父承務郎制

勅具官某父某宗祀慶成均福寰宇高年尤吾所
尊禮爾稟厚養深年過九袞有子登名于奉常議
方立矣錫慶䟽封用勸好德可

林禧子封母孺人制

勅具官某母某氏宗祀慶成均福寰宇高年尤吾
所尊禮爾稟厚養深年過九袞有子登名于奉

毋訓昭矣錫慶疏封用勸好德可

歸順人孫政鮑義邊寶張仲于德楊翼
張彪張實高三受張旺汲漢臣邢海蔡
青魏成方元郭通綦全張時並補承信
郎制

勅具官某人等討叛以義懷服以仁殲渠貸歸
斯受之爾能革心奚愛勇爵祗服寬恩勉圖報效
可

歸順人王元純補迪功郎制

勅具某人討叛以義懷服以仁殲渠貸歸斯受
之爾嘗為士奚愛文秩祗服寬恩勉圖報效

史復祖除刑部郎中制

勅具官某朕間者閔雨念中外獄吏奉吾法不虔
逮繫多淹上干和氣亟下宥減之令而雨憲部列
屬必求知朕意者爾靜而不浮謹而不迫明習于
律令而不苟累駕緹屏具有善譽輟郡而郎參聽
四方之讞奏其選甚高公則強禦不能欺恕則文
致不能入勤則冗釀不能困欽哉監于茲祥刑以
達朕好生之德可

軍器監兼刑部郎官李直柄除大理少

卿制

勅具某我神宗定官制李寺卿一少卿

才職刑獄今園土空虛治獄雖非宿其業
四方奏讞萃於斷刑業可不宿乎爾惴惴近厚容
氣儼肅習于舜士師周司寇之典而以惻怛行之
五為理官三為憲曹其業宿矣爰命爾以亞卿斷
天下之刑宥過無大刑故無小能知此意則可以
明于刑之中率又于民棐彛念之哉可

權工部尚書松江制置副使知黃州兼
淮西制置使趙范除兩淮制置大使節
制巡邊軍馬兼松江制置副使制

勅江為國之門戶淮為國之藩籬門戶嚴則謝元
無後顧之憂藩籬固則祖述有前進之

運掉之如意在表裏撐拓之得宜分外闡以相維
總中權而尤重具官某兼資文武世篤忠勞贊籌
江漢之衝隱若敵國制勝淮海之表賢於長城功
雖著而有謙抑之風氣雖銳而有沉深之度知可
屬於大事期共成於遠圖殘虜宿讎歟一朝之就
燼中原故壤莽萬里之為墟欲乘車攻復古之機
無出天保治內之略孰強吾意爾壯其猶拔諸八
座之聯付以元戎之寄淮東西之星壘盡受拍麾
江上下之雲屯參聽號令本之老成謹重之識行
之平定安集之心以守為攻以全取勝乃若秦人
之鹿角相資山之蛇首尾俱應必能通脉

可方諸道斯可會精神於一家近濟中興用光前

趙蕤除大理寺丞陶木司農寺丞趙崇
岳太府寺丞姚珪國子監丞賈似道軍
器監丞制

勅具官某等漢宣帝厲精求治綜核名實以練群
臣黜陟有序衆職修理上下無苟且之意迄濟中
興朕甚慕之爾蕤世業之華器能精敏爾木儒林
之望議論堅明爾崇岳公族之彥材諳通暢爾珪
決科之雋講習有源爾似道克家之美趣尚不苟
廷尉大農太府有丞冑監戎監亦有丞仕爲我

治之丞者承也所以承輔其長使無曠也政事
文學法理之士繼自今咸稱厥職則予以懌可

林申除宗正寺簿趙鎬夫司農寺簿趙
汝謐太府寺簿余元虞國子監簿制

勅具官某等漢宣帝厲精求治綜核名實以練群
臣黜陟有序衆職修理上下無苟且之意迄濟中
興朕甚慕之爾申茂於踐敷聲華甚暢爾鎬夫勇
於奮厲材術孔優爾汝謐抱負純明志不苟售爾
元虞涉歷詳練材不自樸宗正大農太府冑監皆
有簿往爲我分治之先簿正祭器聖人猶不敢忽
哉崇之盡也政事文學法理之士繼自今咸稱厥

則予以懌可

趙汝訥除司農寺丞杜範軍器監丞李
以制大理寺簿章勸將作監簿制

勅具官某等漢宣帝厲精求治綜核名實以練群
臣黜陟有序衆職修理上下無苟且之意迄濟中
興朕甚慕之爾汝訥秀于公姓材刃有餘爾範穎
于儒紳業履甚度爾以制金玉其質安雅自將爾
勸弓冶其傳謹畏自飭大農戎監有丞李寺匠監
有簿往爲我分治之丞以承輔其長簿以糾正厥
違非特示進擢之榮也政事文學法理之士繼自
今咸稱厥職則予以懌可

准西安撫司機宜兼通判廣火劉子澄

除軍器監簿兼准西安撫司參議官制

勅具官某邊閫上介之置非內地比中原事機之
集非他時比故擇材尤謹爾氣稟爽邁論議英發
與聞經略西事之機籌亦既熟矣班王朝而長莫
府厥任逾重深沉者無躁謀老成者多遠慮爾能
贊乃牧圖全而制勝功懋懋賞朕所不吝也可

國子監丞張昀除秘書丞制

勅具官某寺監皆有丞中祕爲高天球琬琰之出
元圃梗枿杞梓之生鄧林地望殊也爾學殖環粹
猷翹拔蔚乎諸儒之穎丞戎冑監不撓于法而

孝令行賢問益昭西崑群王之府游其間者皆天下選爾往丞之地望稱矣本固則末茂形大則聲宏其益充所養以待方來之用可

太府寺丞尤煇除樞密院編修官兼權

檢詳制

勅具官某 國朝經武要略一書尊閣於樞庭歷萬幾之暇親御翰墨作經武閣三大字扁之事增重矣職刪潤者宜稱爾涵負器識之高講明理義之熟困能不失所亨此致養所以致用也中興保大定功之略咨爾纂修垂則于億世時政有記會計有錄併以屬爾而檢詳兼

之具慮却顧密贊帷籌求所以

利社稷斯

無忝家傳之學可

太府寺簿劉炳除諸王宮大小學教授制

勅具官某行葦忠厚內睦九族朕豈惟睦之必擇師儒以玉其成爾西產之良遽於易能發明未盡之蘊其師表于磐宗紬繹義理切廟情性使成人有德小子有造則予汝嘉可

軍器監丞謝奕禮除大宗正丞兼權兵部郎官制

具官某丞郎朕所重非其人示輕畀爾葦平之

齊有詩禮之傳陰馬之族無富貴之累可謂雅器
矣丞我太宗攝組郎省豈特用爲爾榮恭儉惟德
恪勤廼事朕將以是觀爾之致遠可

賈似道特轉奉議郎制

勅具官某朕建后於相家又命妃於法從家而閔
睢之化行進封有俶推恩惟稱爾襲芳弓冶之傳
承暉四星之首擢丞武監進秩二等奕奕光榮矣
務學好脩用燕多祉可

度支郎中謝采伯除軍器監制

勅具官某具粵之劍取其地良於田人其材
美於觀諸此得器使群工之首爾生相

氣之良也提儒科而有能聲

也地良材

美繇郎版部長戎監疇不謂宜豈徒以肺附進哉
易之除戎詩之備械書之穀胄敵干皆今急務毋
視訓工程作爲猥釀而不之屑可

魏峻除太社令楊璪除藉田令制

勅具官某等杜藉置令類以公卿佳子弟處之繼
停鵠峙於梧竹間貴其稱也爾峻貂蟬世家風度
凝粹爾璪筆橐名裔氣稟開敏或司國社或掌帝
藉列在容臺培養遠器其益勵于學以對寵榮可

華文閣待制知瀘州魏了翁明堂恩

進封蒲江縣開國男加食邑制

勅朕蒐儀先甲歲祀上賦思齊之詩慕親方切
稽我將之頌饗帝尤嚴忱三靈之宴娛適百祿之
來下有懷時彥宜錫神釐具官某學貫乎古今氣
塞乎穹壤立朝素節挺朝陽之梧桐去國丹心凜
歲寒之松柏屬更張之伊始願趣召之宜先潁川
正急於借恂宣室遂遲於見誼既底于治廼端其
歸維昔宗祈敷時餽惠駿奔百辟曾齊昨之靡遺
燕衍一賢胡曾膳之未至宜爵升於穀壁仍戶所
於畚圭爾毋謂萬鐘之何加朕方念四簋之不飽
亟承顙屋入告嘉猷可

平家文集卷第十七

平

第十八

外制二

諸王宮教授蔡仲龍除太常博士制

勅具官某奉常禮樂之司王政繇出朕方起耆儒
爲介卿以備諏訪博士參之宜得賢爾仲龍醞藉
其學詳雅其度楷模宮邸蔚有賢聲端委佩玉捥
經以訂損益之文折是非之議蓋裕如也彼度吾
所能行而遷就焉朕安取此可

太社令季晞顏除大理司直制

勅具官某三尺法枉於舞文吏之手朕甚憫焉必
得古之遺直而後可爲邦之司直爾詞藻有華業

履有度所居官惟法守是謹以是議法於廷尉不
撓不折不僭不濫而王道行皇極立矣枉已未有
能直人則孟軻之戒可

敷文閣學士李臺 明堂恩加食邑實

封制

勅朕蒐儀先甲戴祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有懷時彥宜錫神釐具官某學博而識明氣
全而節勁螭頭去國望久鬱於論思豹尾行邊功
獨高於綏定屬大權之親攬務衆正之詳延首告
李公以束裝欲爲賈生而前席正深樂只且亟來
思維昔宗祈敷時餽惠駿奔百辟曾齊昨之靡遺
燕衍一賢胡魯膳之未至肆疇采邑仍衍真畬爾
母謂萬鍾之何加朕未嘗五秉之輕與懋承顯渥
入告嘉猷可

戶部侍郎京湖制置使史嵩之 明堂

恩進封鄞縣開國子加食邑制

勅朕蒐儀先甲戴祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有嘉邊最宜錫神釐具官某賦穎脫之才抱
輻湊之略從塗融顯俊世業於韋平制閫崇嚴聳
軍聲於羊陸惟四履遐烽之絕警故九筵精意之

潛通禮既底於熙成福寧容於專嚮爵升蒲璧戶
衍畚圭帝命式于九圍朕既荷受球之寵天威不
違咫尺爾毋忘拜胙之恭懋暢英猷對敷景況可
徽猷閣學士新知太平州鄒應龍 明

堂加恩制

勅朕蒐儀先甲展采上辛賦思齊之詩慕親方切
稽我將之頌饗帝尤嚴恍三靈之宴娛適百祿之
來下有懷夙望宜錫蕃釐具官某學擅倫魁望高
法從居易以俟命初無徇世之心充實而有輝未
究濟時之蘊試望之於馮翊得汲黯於淮陽雖廣
合宮之詢尚遲宣室之見維時熙事丕舉慶條肆
加多邑之榮庸示名藩之寵綏我思成者在於溫
恪介爾景福者由乎靖共懋展英猷對敷休渥可
華文閣學士知慶元府余爚 明堂恩
進封信安郡開國侯加食邑制

勅朕蒐儀先甲展采上辛賦思齊之詩慕親方切
稽我將之頌饗帝尤嚴恍三靈之宴娛適百祿之
來下有懷宿望宜錫閔休具官某學擅名儒材優
法從長沙之稱吳芮久藉蕃宣東海之得翁歸更
需鎮撫雖緩受釐之訪靡忘籲俊之思迺瞻明禋
迄成熙事餽惠下逮於輝胞之賤脈膺上親乎族
姓之尊豈繫時髦可後祭澤肆進徹侯之重仍加

采邑之腴綏我思成在於溫恪介爾景福由乎靖
共趣懋展於英猷用對敷於休渥可

楊汝明聶子述 明堂進封加食邑制

勅蒐儀先甲展采上辛賦思齊之詩慕親方切稽
我將之頌饗帝尤嚴恍三靈之宴娛道百祿之來
下有懷宿望宜錫閑休具官某業擅名儒材優法
從騎星辰於奎閣步武寢穹挹風露於珍臺精神
更遠屬改弦而更始每前席之興思廼瞻明裡迄
成熙事餒惠下逮乎輝胞之賤脈膺上加乎族姓
之尊豈繫時髦可後祭澤肆肇開於公社仍申衍
於爰田雖舉邦彝實均帝社予靡忘於寅畏爾毋
替於辰猶可

吏部尚書崔與之除端明殿學士提舉
西京崇福宮制

勅節誼天下之大閑而厲其節者在人主德齒天
下之達尊而褒其德者在朝廷朕瞻懷東海之濱
夙著南陽之望渴於見晚趣使來思顧抗志之何
高宜疏恩之特異具官某純明而積學靜定而善
謀東撫淮堧制勝紛拏之表西馳蜀道計安震擾
之餘乃 寧考簡知之深予冲人往想之切遲十
年之主觀俯一旦之旌招彋彋之賁丘園儀圖共
政翬翬之樂畎畝懇請辭行屹砥柱於患失之波

歸靈光於戒得之境勉從雅志不振高風維元祐
諸賢之方來獨范鎮屢召而不至進承明之祕殿
領崇福之殊庭茲復見於耆英宜一循於優禮鳳
翩翩而亦集爰止朕雖阻於儀刑駒皎皎而母有
遐心爾尚殫於訓告可

華文閣待制江西安撫使陳韓除權工
部侍郎兼江西安撫使知隆興府制

勅政令寬猛之中而後有苻澤之茲民困飢寒之
迫而後有潢池之盜鉏萌芽則力易圖滋蔓則功
難有嘉討捕之勞庸示褒遷之寵具官某忠以體
國儒而知兵遏淮寇之鷁張威名蚤暢殄閭寇之
蠹起籌略重高綠林動於循梅黑祲被於汀贛跳
梁莫制震蕩靡寧朕合三道而建元戎爾鼓諸將
而鑿劇賊訪鴻鴈於棘矜之下追狂飜於篁竹之
間左翦右屠而禽其良旣大懲於弗靖下筦上簞
而安斯寢遂咸樂於有生以數年宣力之勤底一
且成功之偉宜進班於起部仍宅牧於洪都勉爲
朕留益振如虎如貔之氣盡除民蠹永凝買牛買
犢之風可

大理寺丞鄭伯謙差知常德府提舉常
德澧辰沅靖州兵馬制

勅具官某武陵枕重湖帶五溪民夷錯處牧御匪

易必熟知德意者往綏之爾厚而不浮莊而不撓
正于廷尉惻然惟恐一民之冤德意蓋熟之矣
布藩條旁制四郡奉法循理以康乂民夷俗亦將
聞風而帖服本正則末治也朕方以責實課吏爾
求爲可知嗣對光華之渥可

復中大夫直龍圖閣致仕季衍特贈通
議大夫制

勅具官某天未有久而不定者士君子所以不急
乎人之知而蘄乎天之知也爾公而忠廉而直所
至厥績用茂顧以閑退終人勝天乎朕思起事功
於積弛而才之難九京莫作良深悼歎既還爾秩
又當直義圖進兩階以追榮之天者定矣魂而有
知歆此愍章可

新知西外宗正事趙彥紆乞休致除直
祕閣宮觀制

勅具官某奔競成俗如水下趨有安於命誼而無
得心吾能尊顯之爾業履平實治行廉靜嘗爲部
刺史通顯矣耻於浚常之求甘從肥遯之樂讀書
求志若將終身朕起之外宗曾莫能奪何眷懷之
深耶寓直木天優游間館身愈退而愈榮可以愧
世之嗜進而驚得者可

王儀特轉朝奉郎致仕制

勅具官某仕者以負外郎致其事則澤及後嗣非會課應格不可倖得滿疏通而勤敏嘗貳安慶板築之功居多引疾告老進秩一等不俟積闕遂郎負外殊恩也歸而教忠尚其無斁可

朝散郎直祕閣李燾特轉朝奉大夫直華文閣致仕制

勅具官某朕新美政化民獻有十夫子翼方來而未艾也胡一賢之不慙遺爾蚤從諸老之游熟講有用之學果達而藝從政何難時未可爲則卷而懷之時可爲矣則歲不爾與果制於命也耶陟序正郎陞華奎閣榮其歸老示我惜賢可

歸順人僞防禦使樊辛特補武翼大夫

忠州刺史淮西兵馬副都監制

勅具官某淮右鞠旅汝南歸疆爾有簞食壺漿之迎我無亡矢遺鏃之費肆嘉知義易授穹階往分刺郡之榮仍領護戎之寄勉殫忠力用荅殊恩可

李大謙特轉朝議大夫依前直寶章閣致仕制

勅具官某竭忠盡瘁者人臣之職分榮始厚終者人君之恩禮爾寬平而栗精練而介吏能著聞久矣輟從郎省司臬左淵皐皇臨遣精神猶炯然也亡幾何遽以謝事告良用閔惻華之奎直佚之詞

館又陞之元士始終恩榮爾尚奚憾可

寶謨閣待制致仕毛憲 明堂加恩制

勅蒐儀先甲展采上辛賦思齊之詩慕親方切稽
我將之頌饗帝尤嚴恍三靈之宴娛適百祿之來
下有懷宿望宜錫蕃釐具官某業擅名儒材優法
從松階凝邃了忘勢利之榮栗里蕭閑自適性真
之樂屬厲精而更始每籲俊之興思迺瞻明裡迄
成熙事餽惠下逮乎輝胞之賤朕膳上加乎族姓
之尊豈繫耆英可後祭澤肆衍邑畬之富庸增家
食之華雖舉邦彝實均帝祉予方篤養老乞言之
意爾毋忘歸美報上之忠可

許應龍除禮部郎中制

勅具官某朕親政以來除南宮郎者再西垣北扉
斧藻王度皆繇此其選爾紉襲奎蕙之芳步武珩
璜之節璧海瀛山休問藉甚望郎出守挹汗瀾之
澤于潮學益老矣撰儀草奏挈之華峻能以博古
之識昌用世之文其升也孰禦可

司農寺丞傅壘除都官郎中制

勅具官某周司隸總冗辱之役屬秋官漢都官從
事掌中郎官不法屬司隸今在曹憲部挈令隸士
職古而事簡爾儒術通明吏事詳敏累綰郡紱綽
有治行蓋能世其家者涉筆農扈甫謂之來賜墨

隄廉趣進厥序其欽飭百隸使不枉于法以培鄉用之望可

淮西強勇軍統制呂深轉武經郎制

勅具官某廼者山東逆儔敢犯王略大振貔虎之氣亟正鯨鯢之誅制閫第功爾嘗鏖戰進宮三列仍統一軍其日夕淬礪以稱信賞可

趙汝遇除度支郎中制

勅具官某地官帥屬以經邦用司金職其入司度職其出贏虛所關維材是授爾駁歷中外以老成精練聞國費積冗軍調紛集楮幣鹽筴術窮而莫繼爾其精意計度量入爲出斟酌損益而罔厭中毋使妄諸有司之吝可

安恭行除大理寺簿制

勅具官某朕緬懷先朝樞臣保蜀之勲而厘其報既擢其子又錄其孫爾競爽而警敏王父所鍾愛也丞郡東川方騰善譽簿正棘廷趣登華綴三世有蹟于朝榮矣哉仕優則學圖稱厥家可

利州路轉運判官陳隆之除直寶章閣權知沔州兼利州路提刑兼提舉制

勅具官某蜀號天險沔當要衝積吾百年之經營空於一旦之蹂躪孰寬憂顧宜得偉材爾氣銳於理禁術優於應變祁山斜谷之遺迹木牛流馬之

故智紬繹蓋精輟從漕輓往圖控禦合兩節奎閣以重其行爾能以公滅私一意國事阨塞當築堡塢當修流離當集疲弱當練悉爲朕挽舊觀而回之進可以瞰秦隴退可以蔽梁益則維汝功可

利州路提刑王翔除利路轉運判官制
勅具官某武侯用蜀每患餉道之不繼以木牛流馬爲未足而雜耕渭上規摹遠矣朕訂古謀今慨然于懷爾志氣閎壯材猷瓌達周旋劒棧之表具著勞効繇憲而漕豈特以平時將輸望爾關隘空於寇攘閭井蕩於兵燬舊規猶未還也爾其以堅力行實政安輯流離經葺荒墜使民趨生業之樂則兵享耕屯之利西顧庶其寬乎可

宮觀葉莫除權發遣贛州提舉南安南雄汀州兵甲制

勅具官某章貢與閩粵錯壤其俗易搖而難服奉吾詔令以填綏之其惟良二千石乎爾和平而有制莊靜而有立武岡戎伍之變洞察情僞密設方略不數旬亮渠授首一邦底寧帥閫上功旣懋爾賞繩於文吏吾帥臣又爲爾明白之起分二水之符坐總三州之甲必恩意孚而善良吐氣威信著而悍獷革心治化蒸蒸如漢良吏是爲不負所舉可

陳良驥轉承議郎制

勅具官某維揚翦寇之賞大闢第功無微不逮爾
庀役瓜洲賁伐援比以自請亦陞一列責實方嚴
思稱所蒙可

王丙特改承務郎制

勅具官某巴蓬山高林深茲民淵藪嘯呼剽劫實
繁有徒爾奮身書生急義鄉井招懷其脅從禽俘
其不率一方安堵制閫上功超授京秩宦塗方開
亦克用勸可

參知政事兼同知樞密院事喬行簡除
知樞密院事同提舉編修經武要略加

食邑實封制

勅朕撫車攻復古之運慕烝民任賢之風我儀圖
之則山甫柔嘉侯誰在矣則張仲孝友廼睠股肱
之重夙咨德齒之尊講內治以旣嚴籌中興而抑
孰進握本兵之寄俾殫謀國之長渙我明綸諗于
列序具官某直大而不倚沉深而有謀愔然其臞
精神溢乎萬物之表皓然其老志氣塞乎兩儀之
間予養晦則密勿以效忱予更化則從容而贊決
凡君子小人之進退暨中國外夷之盛衰備輸啓
沃之忠居賴弼諧之助惟關洛有鼎來之機會而
江淮有前進之規模必元老壯猷乃可以出萬全

必真儒無敵乃可以大一統就煩舊德坐筦洪樞
總提經武之編益懋運籌之略申陪并賦併實圭
臆噫詢黃髮則罔愆朕方謹乞乞番番之戒有常
德以立武爾毋忘縣縣翼翼之圖涉歷深則無躁
謀思慮精則無遺策共恢大業茂對闕休可

資政殿大學士新知建康府曾從龍除
參知政事同提舉編修勅令加食邑實
封制

勅慶曆之開太平范仲淹爲參預元祐之新大化
呂公著爲疑丞朕遵晦十年厲精一旦趣召先
朝之彥俾還近輔之聯誕敷絲綸敷告簪紱具官
某學根乎正大氣抱乎純明其重足以挫衆紛屹
然鼎呂其靜足以燭群動瞭若著龜蚤服在於大
僚耻苟同於汙俗不合則去有待而行鶴鳴九臯
久聞聲而樂只鳳翔千仞迄覽德以來思予興相
見何晚之嗟爾動可爲忠言之喜舉昔大對勸今
力行嘿有契於此心期共繇於斯道更化則可善
治宜增重於本朝折衝何必臨邊奚尚勞於外服
爰輟居留之寄聿嚴共政之圖蒞勅局以提綱拓
爰田而衍賦併昭異數式獎英猷噫六典建於周
家莫先乎設參而置輔庶績凝於虞室尤在乎同
寅而協恭勉殫訏謨之忠共濟垂拱之治可

左諫議大夫鄭性之除端明殿學士簽
書樞密院事同提舉編修經武要略進
封加食邑實封制

勅朕迪簡在廷儀圖共政繇諫長而選蓋僅聞於
二紀之間自倫魁而升况並見於一日之頃繫非
常之盛舉必不世之奇材邇我事樞揚于制綽具
官其身端而行治心廣而體胖鴻漸可用爲儀望
夙高於華著雞鳴不改其度志晚適於槃阿維予
初潛慕世賢詰未親魏證之論已稔蕭生之名迨
躬攬於萬幾首旁招於衆正擢從郡最列在從塗
朝入對於治朝暮進登於騎省規君德則中肅大
學條國事則天保采薇方累疏之前陳已一言之
默寤徑躋宥府密贊籌帷由求之切而得之難故
知之深而用之速總武經之大筆陟書殿之穹班
爵肇啓於徹侯封更陪於多邑以寄股肱之重以
示精神之強噫虞舜之治有五人朕方篤任賢之
意宣王之德洽四國爾盍思復古之圖叶濟廟謨
丕昭儒効可

何處久除直寶謨閣知鎮江府制

勅具官某南徐襟江枕海而控淮地望重矣制勝
孔嚴擇守加遴爾材猷閑碩志氣激壯爲御史諫
官嘗陳內外修攘之略具有本末朕甚偉之冠冕

蓬山未嘗設施祖述擊楫渡江之地以奎直往爲朕圖厥功應接于外屏蔽于內威行愛孚而天險之勢以強京師併蒙福也可

何琮除直徽猷閣福建路轉運副使制
勅具官某七閩樂郊也間者鳴義姦宄多抵冒于法非焦萃苑結莫之省乎爾風槩凝遠性行脩絜世道渫濁能不磷緇朕器之奏對間久矣歛武華要寓直疑邃夙駕暑征往將使拍豈直爲飛輓計以鐵冠觸邪之餘威察一道臧否貪廉而刺舉之使吏姦澄而民氣舒斯稱朕臨遣之意可

董洪父自脩王公瑾父困方岳父欽祖

趙子森父復先陳子椿父千期朱日炎

父師友孫鏞父价以明堂恩封官制

勅具官某總章大饗熙事消成歛福錫民同躋仁壽爾旄期康彊有子仕版京秩疏封式昭善慶可

太中大夫曹叔遠特轉通奉大夫依前

煥章閣待制致仕制

勅訪正元之遺事尚想告猶追長慶之高風遽聞請老莫回雅志庸錫徽章具官某襟度曠夷風規凝粹羊腸峻阪蚤備罄於忠勤豹尾屬車晚寢隆於恩遇勞禁塗而諗疾佚真館以言歸賜杖竊遲掛冠何亟疊進高華之秩仍通嚴邃之班祗服寵

榮益綏壽嘏可

正議大夫程秘磨勘轉正奉大夫制

勅等六曹而上課嚴三歲之遷超四品而升秩重
八年之轉雖循彝典實著恩章具官某粹學淵深
英規山立謀猷獻納備殫日月之忠典冊鋪張叶
應風雲之會繇殊庭之引興每魏闕之存心積閱
既深陟明可後飛鴻自適初何計於穹階鳴鶴相
求肯尚遺於宿德可

問丘梓林炎趙崇熒趙崇森除大理評
事制

勅具官某等典獄惟平之難漢吏用法巧文浸深
爲重爾行已純固莅事精恪丞于北寺不詭不撓
蓋涉深而識定者也考功課吏之法公則一私則
萬殊勉爲我權衡之抑揚惟允嗣有褒進可

權兵部尚書趙至道除寶謨閣直學士
知鎮江府制

勅法從莫如文昌八座之尊价藩莫如扶風三輔
之重必卷舒之有裕斯出入之俱榮具官某蚤以
孝稱晚繇廉進歷耳目之寄每侃侃以自將并喉
舌之官尤循循而唯謹以厭禁嚴之直欲尋閑退
之盟莫挽而留宜華其去赤刀琬琰峻祕職於西
清皂蓋朱轡輦名城於北固亟上中和之最尉予

耆艾之思可

太常寺丞兼權右司曾天麟除將作少

監制

勅具官某永惟技巧工匠之鮮及不如宮室苑囿之無增故繕監不以飭工而以儲材爾䟽通而文寬靜而栗材出鄧林信良矣容臺省闋趣升于少匠厚其儲以致用也爾知噐用利則用力少而就效衆斯識朕心可

王淪轉承議郎制

勅具官某朕觀新店民之語知和糴之厲民尚矣爾守滁日糴辦而民不擾數踰三萬應我賞格增秩旌勞尚鞭其後可

歸順人沙兀惹特補修武郎添差蔡州兵鈐兼權蔡州事制

勅具官某襄漢奮伐淮蔡底平莫府以戎捷來上謂爾能知逆順之分赤心歸誼願効忠力蔡人即吾人也爰畀右階就命爾守復民業以趨耕作士氣以待戰保障鞏固斯稱委寄可

房應發轉文林郎制

勅具官某六駟復土五使置官凡備驅馳悉霑賞賚爾祗吏役例進一階茂對恩榮尚思策厲可

劉顯以父評戰歿補承信郎制

勅具官某蜀關禦寇虢將死勇爾父從之鏖戰繼
歿羽林孤兒漢恩特厚錄爾一官用勸徇國可

石天瑞白華補秉義郎制

勅具官某等方城濯征垂瓠震潰執訊獲醜餘燼
爲空爾能自歸貸而官使尚圖忠効用荅生全可
李駿起復直龍圖閣四川都大茶馬制
勅具官某秦蜀權牧之政分合九幾然非其人分
任而不足得其人合治而有餘爾沉毅足以經遠
果達足以治劇所居底績晚譽更偉坤維事力日
匱茗法壞而後馬政壞頃嘗分任未見其益也茲
庸合以命爾且寓直淵圖以重其行毋俟梓琴陳
慨叱馭能使廉信浹於園戶行於蕃落則摘山富
而効牽蕃矣可

工部郎中鄭寅除尚左郎官制

勅具官某良以止爲體能時止則止然後能時行
則行爾簡粹而通亮爲郡嘗以治理効聞顧時俗
之流從又孰能無變化懼荃蕙之俱茅也而恬然
歸絜坐玩歲華待化機之轉移偕衆正而彙集其
將有行乎郎選甚高毋憚于劇朕方思所以進爾
者可

王邁轉朝請郎制

勅具官某權務萬貨萃焉而摘山煮海之利居多

羨入必賞厥有著今爾材優於從政嘗司出納歲有羨利其知理財正辭之義乎一官懋賞益圖爾庸可

將作少監趙與芮除大理少卿制

勅具官某孟侯朕其弟必卷卷以陳時臬事不蔽要囚爲誥豈非刑者君子所盡心友之篤則誨之切乎爾氣質金玉步趨繩矩卓有大雅不羣之風朕猶欲其政事之熟更也既試之大匠又試之少大理民命至重國脉所關欽哉恤哉其寧惟永爾亦與有令聞可

鄧雲轉武節郎制

勅具官某山東逆儔負固淮楚大振貔貅之氣一空狐兔之群制閫第功爾嘗鏖戰進官四等護戎湖右其日夕淬礪以稱信賞可

王旻

勅具官某山東逆儔負固淮楚大振貔貅之氣一空狐兔之群制閫第功爾嘗鏖戰峻升武級用獎驍雄仍顯戎律之嚴坐鎮邊城之重祗承異渥勉策奇勲可

直寶謨閣宮觀劉宰除太常寺丞制

勅具官某聖人與曾點說漆雕開蓋不汲汲於用乃所以致用也爾得於天者厚求於人者薄見幾

遠引樂道而著書與行乎國政之久者相為終始
世方瀾倒獨落落乎其有風颺朕甚嘉之拔之槃
澗丞我奉常愔然一來尚不負國人之望可

考功員外郎桂萬榮除尚右郎官制

勅具官某比歲倖門開而吏道雜武級猥濫尤甚
綜核方嚴銓筦宜允爾為考功郎氣嚴詞厲吏莫
敢欺推是以修審官西院之法鑒揭而妍醜分衡
設而輕重判劇曹其澄乎來幾何日三錫厥命用
惟其材毋謂序進可

前右正言何萬齡特轉朝奉大夫直寶
謨閣致仕制

於是置廷尉平四人務平之爾梓爾炎爾崇微爾
崇森皆練習律令而文無害故並命以司庶獄之
平明啓刑書胥占咸庶中正中則平矣欽哉可

虞衡除大理寺正制

勅具官某王制獄辭之成史告于正正聽之正所
以正庶獄之不正也爾簡澹而詳敏褰帷嶺嶠之
東以風力著庸命爾正于李吏有上下其手以舞
吾法爾悉為朕糾之庶幾廷中稱平而天下無冤
民可

權知信州史彌志除將作監丞制

勅具官某上饒間于江浙頃悍卒軼紀律以駭吾

民翦其萌可緩乎爾優於應變勇於討惡尸二渠于市而群姦之魄褫千里底定朕甚材之召丞匠監用旌爾能繕修務簡益培雅望可

趙與權起復直寶謨閣淮西提刑制

勅具官某兵刑一也西淮方整軍經武陳時臬事宜加謹爾公族之雋材優而氣盛嘗守輔邦蔚有能譽繁弱可久橐乎起之樂棘進之奎直往司臬于西能使在泮獻囚與在泮獻馘同功則移孝爲忠之道得矣可

大理寺丞桂萬榮除考功員外郎制

勅具官某馮唐白首顏駟厖眉尚書郎以老於識舍豺狼問狐狸有年矣爾以駿發之材邁往之氣列在騎省能於波流風靡之中奮擊大吏疾於迅雷非不畏強禦者乎銜卹以歿歲月奔駛崇階邃職示不汝忘可

兩淮制置使兼沿江制置副使趙范除江淮制置大使制

勅全江淮濟中興莫重乎要衝之勢築壇場拜大將莫嚴乎專閫之權廼睠時髦密承廟筭內養威而植屏外觀變以投機丕建使名特加命綽具官某挺姿果毅抗志忠勤材閎而用周力振西平之

業氣壯而識老遠追鄧禹之風自討賊之策勲即
平戎之定計入儀法從出撫成師朕惟九節度以
無統率而危唐四將軍以有領屬而強漢必中權
之獨揔斯外治之咸張車攻復會東都首經營於
江許闕宮遂荒徐宅先疆理於淮夷茲大恢表裏
之規摹宜盡稟精明之號令翼翼文昌之座堂堂
太一之旗壯本根於荆揚震聲采於汴洛詩書之
帥以尊主爲德仁義之將以安民爲功行三軍則
務於好謀掌六師則貴乎同力觀宣勞之宴久信
任重之優爲江左自有夷吾朕方倚深長之略河
南盡爲晉土爾盍堅綏定之圖可

權工部侍郎留元英除集英殿修撰知

江州制

勅翠綵鳴玉入聯法從之榮皂蓋飛旛出殿名滿
之重不輕厥選宜責其行具官某篤實無華寬平
有則物情方靡初何意於鷹鷂世道旣回仍可儀
於鵷鷺政藉居中之益忽騰補外之章勉徇懇祈
俾圖共理升班論譔留夙望於甘泉奉最蕃宣寄
壯懷於湓浦予曲盡待臣之禮爾益殫報上之忠
可

葉奭除國子博士應禕除太學博士兼
莊文府教授汪之道除國子錄制

勅具官某道存乎人心蘊之爲德行行之爲事業
文辭陋矣朕故謹擇知道者爲學校師爾奭直簡
而廉爾繇融明而靜爾之道英拔而粹俱有得乎
正大之旨庸命奭爲博士以學胄子繇爲博士以
學士仍典藩房之教之道爲錄以糾胄監之不如
規者師道立而皆知以求仁明善爲急化成天下
獨不在茲乎可

著作郎兼權司封郎官蔣重珍除起居
舍人兼崇政殿說書制

勅具官某迪惟先朝策士多得倫魁之彥敷
後人休朕既簡在大僚又簡厥修如爾重珍者以
柱史從華光之游矯矯乎鳳凰之集阿閣黃鵠之
下太液也榮貴素定盛名難居詔燉責難益究爾
韞使碩大光明不愧天聖嘉祐之盛顧不偉歟丁

黃壯猷除金部郎官制

勅具官某朕方經理京洛財計裕於內則事力充
於外金幣委輸鉤考其數以周知登耗而頒節制
司珍職也爾器局明整材華暢茂司庾左制能斟
酌取予歛散之宜以乂我民趣踐郎省參掌國用
曹雖劇刃游盤錯矣抑以是詳觀爾之官可

司農寺簿趙鎬夫除司農寺丞兼提領
安邊所制

勅具官某景壽昌丞大農關內漕穀國使之常平
置倉民便之北邊亦藉以給丞不當如是耶爾鑄
夫機園而不窮氣銳而有立逾月再轉就丞九扈
且坐總邊計材選也孰利當興孰害當除毋使壽
昌專美於漢則職之稱可

軍器監簿陳振孫除諸王宮大小學教
授制

勅具官某我 仁宗詔諸官院教授非止講習經
旨須選履行端慤蓋欲其以身教也爾靜而不
簡而不華可謂端慤矣振振麟定以爾爲之師
渠度於步武之間挹芳潤於言論之頃而成章
冠莫非大雅麗澤講習之說將有考於此可

方大琮除司農寺簿樓杓除軍器監簿
制

勅具官某寺監有簿職鈎稽違失簡矣國以養材
士以養望爾大琮粹然其瑜而靜俾簿于農寺爾
杓凝然其度而立俾簿于戎監鴻之漸而鷺之振
也觀其所養朕不敢忽爾益觀其目養可

知南安軍彭鉉職事修舉轉一官制

勅具官某漢二千石有治理効輒璽書勉厲增其
秩故良吏爲盛朕甚慕之爾果於事功達於識慮
而敏於材江右南接嶺嶠俗驛而難御支壘戢守

能不以鹽絲易保障田里相安蠹賊屏息其漢吏之良乎一秩示勸益進于理以對顯擢可

施梹差知融州制

勅具官某融在廣右爲望郡銅虎符不輕畀爾以淳熙執政之胄克修令猷履平而植固三爲別乘抱璞不售亦老於世故矣以是起家母鄙遠其民而厚拊之廉善達于聽聞斯稱惟良之選可

曹叔遠贈光祿大夫制

勅老之將至甫抗志於垂車生也有涯遽遺言於易簣推我盡傷之意形于贈綬之章具官某薰然澤物之壽尉平成己之學年去國留落而氣不衰晚節還朝虺隤而志已壯淮少論思之選退尋蕭散之盟方惜日以自休胡御風而不返出處本末具知存闕之忠始終哀榮茂享書棺之寵可

季衍直寶文閣致仕制

勅具官某河東守以一人之毀而去雲中守以文吏之繩而罰今昔之通恨爾直方自信無所撓折宅牧淮右竟以賈憎朕夷攷其平生公於徇國廉於居官睽弧之疑可亡也齒髮未衰遺榮何亟進直寶奎尚其吐氣可

平齋文集卷第十八

